

四庫全書

集部

欽定四庫全書

全蜀藝文志卷三十二

明 周復俊 編

序下

贈送 遊覽

入蜀紀行詩序

唐王勃

總章二年五月癸卯余自長安觀景物于蜀遂出褒斜
之隘道抵岷峨之絕徑超玄谿歷翠阜迨彌月而臻焉
若乃採江山之俊勢觀天地之奇作丹壑爭流青峰雜
起陵濤鼓怒以伏住天壁嵯峨而橫立亦宇宙之絕觀

者也雖莊周詫呂梁之險韓侯怯孟門之峻曾何足云
蓋登培塿者起衡霍之心游溝澮者發江湖之思況乎
窮覽勝事足踐靈區煙霞為朝夕之資風月得林泉之
助嗟乎山川之感召多矣余能無情哉爰戒文律用宣
行唱編為三十首投諸好事焉

晚秋遊武擔山寺序

前人

若夫武丘仙鎮吳王殉歿之墟驪嶠崇基秦帝升遐之
宅雖珠衣玉匣下賁窮泉而廣岫長林終成勝境亦有

霍將軍之大隧迴寫祁連樗里子之孤墳竟開長樂豈
如武擔靈嶽開明故地蜀夫人之葬迹任文公之死所
岡巒隱隱化為闍崛之峰松柏蒼蒼即入祇園之樹引
星垣於杏嶂下布金沙樓日觀於長嵯傍臨石鏡瑤臺
玉甃尚控霞宮寶刹香壇猶分仙闕琬櫨接映臺疑夢
諸之雲壁題相暉殿寫長門之月美人虹影下綴虬幡
少女風吟遙傳鳳鐸羣公以玉津豐暇素林壑而延情
錦署多間想巖泉而結興於是披桂幌歷松扉梵筵霞

屬禪局煙敞雞林俊賞蕭蕭驚嶺之居鹿苑仙談疊疊
龍宮之偈于是金方啓序玉律驚秋翔風四面寒雲千
里層軒迴霞齊萬物於二體綺席乘雲窮九垓於一息
碧雞靈宇山川極望石兕長江汀洲在目龍鑣翠輶駢
闐上路之遊列榭崇闈磊落名都之氣眇眇焉洋洋焉
信二蜀之奇觀也昔者升高能賦勝事仍存登嶽長謠
清標未遠敢攀盛烈下揆幽襟庶旌西土之遊遠嗣東
平之唱云爾

綿州北亭羣公燕序

前人

下官

一作客

人間獨傲海內少徒志不屈於王侯身不絕

於塵俗孤吟五嶽長嘯三山昔往東吳已有梁鴻之志
今來西蜀非無張載之懷況乎踐名場携勝友風月無
幾琴酒俄垂半面十年一別千里何少府故人攀桂撫
金石而論心韓法曹新餞班荆臨江湖而執手離亭北
望煙霞生故國之悲別館南開風雨積他鄉之思于時
蒼雲寡色白日無光沙塵起而桂浦昏鳬雁下而蘆洲

晚傍鄰蒼野霜封橘柚之園斜枕碧潭直斷芙蓉之水
既而登臨惜別驂駕少留季札何人親逢贈縞子荆不
敏思掛傾城惆悵北梁揖琴臺而漸間徘徊東道思錦
署以行遙嗟乎人事乖矣江山遠矣請命離前之筆為
題別後之資五際飛文想羣公之不讓一言有贈知下
筆之有神

宴梓州南亭詩序

盧照鄰

梓州地池亭者長史張公聽訟之別所也徒觀其巖嶂

重複川流灌注雲窓綺閣負繡堞之逶迤澗戶山樓帶
金隍之繚繞信巴蜀之奇制也時鳳宸多間上得和平
之政鯁瀛有截下無交爭之人以公寄切上僚故久無
州將連四千石之重任摠十萬井之雄班職逾劇而道
彌高位逾崇而德彌廣市獄無事時狎鳥於城隅邦國
不空且觀魚於濠上賓階月上橫連蜷之桂枝野院風
歸動歲蕤之萱草則有明珠愛客置芳酒於十旬羽服
神交契仙遊於五日圓潭寫鏡光浮落日之津雜樹開

惟彩綴飛煙之路藤蘿香藹挂踈陰以送秋鳬雁參差
結流音而將夕百年之歡不再千里之賀何嘗下客恹
惶暫停歸轡高人賞翫豈輟斯文咸請賦詩六韻以見
志云爾

七日綿州泛舟詩序

前人

諸公迹寓市朝心游江海訪竒交於千里惜良辰於寸
陰常恐辜負琴書荒涼山水於是脫屣人事鳴棹川隅
言追挂犢之才用卜牽牛之賞邊生經笥送炎氣以濯

纓郝氏書囊臨秋光而曝背似遇緱山之客還疑星漢
之游願駐景於高天想乘霓於縮地繁絲亂響涼耐時
斟戲翔羽於平沙釣潛鰓於曲浦乘流則逝不覺忘歸
咸可賦詩探韻成作

送遂州紀參軍序

孫逖

遂州參軍紀公吾友雲將之令弟也敏於行志於道克
脩人彞允副兄勗噫周公之胤紀為其首天祚明德必
將有後不然何棟華之可久也選曹舉善羣吏須才九

霄始構一命而偃穆卜吉日遄征畏途緬躋岷峨遐涉
褒漢宿息巖險波臨湍悍仗信不慄載義必亨方暴忠
臣之志固無垂堂之責爾之寡兄克施有政是則是效
念茲在茲祛利則覲心永隔遠嫌則荒言自絕故雖邛
僂之產巴蜀之饒不潤脂膏誰謗薏以懋厥丕德時惟
哲人羣公贈言要僕題序

送王侍御赴劍南序

陶翰

國家既誅邛笮之遊魂收滇池之陳地以蠻貊君長尚未

即序徼外新國約非甚堅將若宣王風布中興必侯才英
矣監察御史王公志標勁節天假異能秉心而忠義必聞
多方而文武不墜我中丞鮮于公以功名立破城江南闕
啓而虜不敢窺城峻而敵不敢守者皆以匡時之策伏橫
行之氣不然者豈有夕舍一尉旦磨

集作
麾

三軍盱衡於不

毛之間決勝於大荒之表取廷評者決月登憲府者周
星繡衣照于江源風霜掃于劍壁斯不足畏矣中朝名
雅嚮義趨風餞筵傾誠翰墨紛矚百壺追送來登董原

之野萬嶺蒼然更繞華陽之國余以授簡敢無斯文

送孟大入蜀序

前人

襄陽孟浩然精朗奇素幼高為文天寶年始游西秦京
師詞人皆難其曠絕也觀其匠思幽妙振言孤傑信詩
伯矣不然者何以有聲於江楚間嗟乎夫子有如是才
如是志且流落未遇風塵謂天下無否泰無時命豈不
謬焉翰讀古人文見長楊羽獵子虛賦壯哉至廣漢城
西三十里清江黃緣兩山如劍中有微徑西入岷峨有奇

幽皆感子之興矣勉旃故交不才以文投贈

送張玄武序

元結

乙未中詔吳興張公為玄武縣大夫公舊友河東柳潛夫裴季安扶風竇伯明趙郡李長源河南元次山將辭讌言悉以言贈上有勤仁惠卹勞苦之風下有惜離異

戒行役之諭

一作論

元子聞之中有所指國家將日極太

寧垂休八荒故自近年兵出滇外訂者或曰西南少疲是以天子特有命也將天之命斯未易然於戲蜀之遺

民化於秦漢紀古之道其由未知無置

一作智

此焉

一有故字

姑取廢也如德以涵灌義以封植其教遲遠其人迎喁
至乎不可固未必也則曰保仁以敦養流惠以懷卹知
其所勞示其所安無以醜之當可然也潛夫聞之中興
不樂歎曰吾嘗與朋友有四方之異不甚感人如今之
心多問其故對曰嗟嗟子能有是言也吾故感焉行有
規矣無曰我年四十多哉無曰我時祿位下哉公乃復曰
當不失於二公之意為異年觀會之方也已敢戒行役敢

自清慎終不貽朋友之憂何如於是醉歌中堂極樂而
已諸公有贈遞相編次

送李彛宰新都序

任華

宗室後進有以學術辭藻著稱者彛也少好學通九流
百家之言善屬文頗有大節去年制舉不捷無何以書
歷抵二相國論安邊術由是召試西掖凡數十百人彛
與莊若訥高郢同入高等何垂翅於制舉而奮翼於西
掖哉蓋道之屈伸命之通塞各有時也執政以彛大人

在蜀故授新都以榮之曩豈不欲高步臺省時時與朝廷羣公談笑所以俯就遠縣蓋為大人屈耳秦雲滿天
條聚忽散與子分飛亦爾也古人別遠貴於贈言子昔
為什邡令蓋鳴琴不下堂而理今領新都則異於彼焉
蓋以廬井灰於焚蕪之後毗庶瘡於刀箭之末樹立存
育洪惟艱哉況奔衝填湊晝夜風雨誅求供應旬晦山
岳其親庶務則宜戴星而出戴星而入焉其接賓客則
宜一沐三起一飯三吐焉此朋友之望也如月照雪峰

花明錦江當有新詩時復寄來念之哉李生

送張都督赴嘉州序

于邵

伊人之平康由我以專達否則政弛人何賴焉在昔漢
宣永懷至理思與二千石之良者共之貞深

一作竟探

其元

以化天下非道熙涉降理際天地

一作人

則不可膺是高

選尚書左僕射冀國公審才以底用論定而後請將欲
更蘇息復整齊且如張公無出其右緊受授則為憚但
彼嘉陽之人所益多矣况學致廣大心自精微議道置

法若示諸掌一舉雲翼三十為郎分兵領部義然後取
公以之才大時論用少以今之多艱乎謂用大則用之
大用小則用之小在我而已抑無惜焉良月撰吉輕舟
既具長空青冥未有黃落緹騎百從載旌而前戈矛生
風左右如舞且犀灘古地熊阜外虞通波萬里并客攸
攝其無以易者盍思無邪耶嘗寮為心望此行矣大幕
邀錢三軍助較一作教樂只君子如何可忘而後利涉信
宿人歸父母其顏渥丹下令如春受教賜知常謀始不

決年而國賦足軍實倍啓迪恢達為諸侯雄

德政序

鄭藝

臣嘗讀唐書竊觀太宗每以為將致治平必先仁誼得
賢則理失人則危可鑒格言足徵遂古豈不以化馴易
服威束難齊哉然農戰交修德刑共舉將亂也其政必
暴將弊也其風必佻將圖九合之威亦賴五臣之佐苟
虞害衆莫若任賢視今可以知昔矣高祖皇帝以汴賊
弑君唐朝絕嗣左袒罕聞其歸漢同聲皆倣於吠堯上

下相蒙酤為醉國寰區之內億兆無依競陳推戴之誠
願正君臣之位難違衆欲遂啓丕圖戡禍亂而俟中興
協會盟而歸大國為蜀之帝報唐之恩明孝皇帝受命
之六年天清地寧珠連璧合肇修人紀於變時雍至若
皇墳帝典之精河圖洛書之奧步驟於羲軒之際損益
於文獻之間不然何其畫善畫美之如是也遂使蠻夷
向化吳越輸珍麟鳳効祥草木呈瑞矧復英賢間出俊
乂羅生上猶以為未也方且側席勤求登用才哲循

名責實較德論功沮勸有謀黜陟不濫鑿乾締構允歸
睿作之功壽國陶鎔必有挺生之佐式扶昌運對越上
玄由是中外文武將相公卿洎庶尹庶史各率厥職奉
若天旨越正月武德軍將校吏民緇黃耆艾等列狀詣
護軍使請以節度使徐廷瓊德政上聞願勒碑記且以
借留為請上憂勤庶政以百姓為心凝旒稱歎者久之
謂翰林學士藝云朕司牧元元將開壽域使國內郡縣
治行皆如梓潼朕何憂哉大吏久於官古之道也況衆

欲之乎朕既俞其請矣卿為我撫其懿實播無窮之聞
以塞民望微臣奉詔恐懼叙曰臣聞龍飛九五山川効
雲將之靈鵬擊三千風水運波臣之化雖復同心同德
雅資十亂之功乃聖乃神永賴八元之佐內則臯夔協
贊外則方召專征神謀且貞師律具有兼膺注意宜屬
宏材此我皇帝之御宇也不顯帝圖顧茲天力四神踐
雪五老飛星投綸負鼎之人爭伸弘業委輅請纓之士
競奮深機蕙帳空而明月常孤蒲輪至而清風自激猗

歟偉歟雖居宣武之間未若我朝得人為盛也其或家
連戚里身陟齋壇益揚謙損之風靡見驕矜之色功超
賈鄧政邁黃韓有若武德軍節度使徐公斯可謂一時
之英也公名廷瓊字敬明東海剡人即國之元舅也世緒
標奇門風襲煥鎮為峰鼎用作雄銍父子則貴比金張
兄弟則政同魯衛騰八龍之聲價齊二鳳之羽儀阮竹
皆芳田荆并茂金相玉印各炫晨葩虎節師壇共觀晝
錦徒思徧舉抑亦倦譚公王父唐京兆武功縣令追封

尚書左僕射太師高平王政績頻彰勲華早振自激封
侯之志夙膺濟世之名西晉殊功榮聯邸第南朝雅
望顯並官婚貽謀各著于承家致用皆光其佐命朱輪
華冕豈獨推恩甲令門風實先種德遞傳奕葉孰與提
衝歷佐昌朝宜鍾異氣公中含靈秀大爽炳靈幼挺英
姿夙彰雅操稟說禮敦詩之教蘊經文緯武之才欲紹
家聲早叅戎右敵國相吞之候決在毫釐陰符必勝之
機制於掌握琯戈寶鼎門崇八命之榮玉帳金壇神授

六韜之妙故能名高大國業嗣良弓輕鎮北之無丈恨
征南之不武圮橋靈叟謂謀略之可傳汶水神翁知功
名而必立自繼膺睿眷兩踐渙符四封無刁斗之音千
里有袴襦之詠政成剖竹擁重執金掌領孤兒每警巡
於晝夜扈隨大駕遠鎮定於邊陲纔復六飛將分雙節
上以郵城奧壤潼水名區粵自艱難久罹瘡痍獄市無
寄杼軸皆空羣盜猖狂幸寇恂之去日遺黎憔悴望郭
伋之來時不有改張何其偉又爰求賢帥式重雄藩乃

授公武德軍節度使公攬轡造征下車畢理彈壓豪鷙
封植疲瘵究本尋源提綱振領害於人者雖大必去利
於人者雖小必行嘗謂人曰法者政之要也不可以不
峻其隄防禮者教之本也不可以不謹其律度食者民
之命也不可以不勤其稼穡兵者戰之器也不可以不
肅其號令率是四者盡其一心上可以翼衛朝廷下可
以儀刑藩翰吾得之矣爾其觀焉公以管内數多亡命
姑務偷生久聚萑澤常為虺蜴狡穴皆依於窮谷妖巢

各恃于幽林化之不悛來而復叛郡邑虞其蹂躪路岐
苦於歎歎公密運良籌嚴申軍令盡投私器皆挾禍胎
益其戎兵誠其彊吏商旅無滯貢奉固艱王尊申京兆
之威龔遂去潢池之患勞徠罕倦蕩析咸歸動有常規
賞無橫費上勤時貢下贍軍須月未及其授衣士已忻
於挾纊賑其匱乏釋彼愁顏幸夜犬不驚宵魚自放哀
矜庶獄慎恤惟刑赭衣盡伏其神明丹筆立分其情偽
絕加等之聚斂革無名之征徭平衡不謬於錙銖嘉量

罔欺於主撮公又仰稽前古俯瞰遺踪思棗祗闢地之
謀味韓浩屯田之計膏腴靡棄黍麥頻豐夢果應於牧
人利可資於寡婦貢賦加倍獻奉相望又歲別進軍食
因沃潤之鄉置牢盆之務商徒繁會官帑委輸檢吏通
民機能制用矯時阜俗儉以率先貫天錢而已靡星文
認寶氣而已有劍闕文來奏入課連最聞薤本可留足
表富人之術芋區難並咸知濟物之方公以鳴社嘉辰
繞樞令節祈聖壽於莊嚴之地祝宗祧於降誕之期自

捨俸金於惠義寺構華嚴大閣向者公府未完軍衛莫
稱於是載修輪奐別創規模庭架虹梁門羅虎戟層樓
燕賀偏增鼓吹之雄廣厦翬飛益動旌旗之色路當衝
要地控都畿使車晝夜以交馳候館往來而宿餉每傾
公帑用飫賓筵休聲洽聞靈貺昭感紫芝三秀黃犢並
生天唯發祥地不愛寶迴掩得禾之異果符登麥之文
歌德詠仁言將不足含和吐氣樂固難名大矣哉公之
問俗觀風阜財迷職焉可得而稱也爵賞既行中外同

嘉遂冊拜中書令趙國公加食一千戶通前五千戶公
嶽降標奇星精稟異溫如珪璧郁若椒蘭智合韜鈴言
無鉤距運籌決勝荀攸可比於良平仗鉞被威謝艾足
同於方召斫機照理植操資忠允武允文多材多藝軍
中講學馬上註書揮刀則立觀飛泉盤弮則惟聞折樹
而又貴不自滿謙而益光饗士投醪延賓比飯帳下之
犀渠貝冑咸感吮癰樓中之螭首蛾眉寧矜笑璧金閨
密行簪組美譚里巷相觀風雲動色宸衷夙注寵詔已

行致門境之允諧固本朝之是衛況家豐懿戚治陟殊
尤心膂連營蓄雷霆於北落股肱重鎮寄柱石於東川
克副分憂合膺異渥宜其珉麗德瑩檢圖功懋績著擁
旄化行偃草比屋而乞留侯霸叫閭而願借耿純詎可
使螭首翠碑未披文而相質麟臺彩筆不寫照以傳神
臣志慕陽秋工非潤色仰遵睿旨敢述殊勲曾無少女
之詞預怯中郎之鑒所冀陵遷谷變尚窺沈水之文地
久天長永覩生金之字謹為銘曰

金行啓運鼎業鑒乾麟御瑞紀鳳舞昌年層潤浩注國
祚遐延光凝寶匣福霽祥編上詰繼文皇圖增煥得一
踐義登三轅漢懿綱牢籠大鑪真觀宗社還資微明接
旦大虛寥寥中貫元精麗物為瑞應人為英英英徐公為
國而生脂膏不染獄市不驚智勝兵強化行民附屢立
奇功繼膺寵數帝念徐公聿齊其務迺睠梓潼并有饒
賦公至若何時雨霽霽枯苗擢穎涸轍騰波摧奸禁暴
劉弊止訛襁負而至動植興歌八政何先以食為天卧

鼓勤農免胄服田耒耜接肘臺笠摩肩閭閻風靡稼穡
雲連衆害既去纖惡皆除頒宣化育慎恤刑書徽纒自
朽囹圄常虛輕徭薄歛政協蒲蘆老安少懷遠至邇肅
風雨時若家給人足戶溢版籍賦登公牘儲峙孔多貢
輸相屬神明之正誰為之師公之俱美福祿攸宜位隆
鳳沼恩注龍墀梓人頌德天子嘉之爰命荒虛奉揚聲
烈揚子神疲江生思絕涪水東注銅山西揭帶礪無期
永旌賢哲

送彭學士序

彭名乘
華陽人

宋范鎮

蜀當西南陬曰興坤坤為文為臣故世有方正柔靜之士作西漢時司馬相如始以文章顯而後王褒何武揚雄事業著於篇唐陳子昂用古道振而時文於變意者岷峨蘊精江漢蓄靈須其時克生其人乎祥符四年宋興五十二載矣是邦人新去兵革之苦始漸聲教之學而隴西集仙公以道藝行誼登王府主上紹休摠秉權綱獨觀昭曠恢大同之化罷三互之法遂有普慈之授

焉縣令前驅弩韞甚寵子弟師教檄文聿修里有冠蓋
之華家連序塾之盛議者謂文翁玉堂子雲書臺興儒
以來未有侈於今日者已蓋聖人用一賢出一令觀悅
之道其利博哉昔楊仲伯教生徒上名錄者三千魯仲
康選高第至郡守者數十異時立本朝議外廷絲綸王
言潤色神化則西州士夫未量其教育也南荆領軍非
久留之地故略而無述

送馮樞密還朝詩序

前人

茂州羌漢冉駝之遺也距成都十舍而遙雖羈蜀郡縣而不以中國之法治之故其叛服不常緩則盜邊急則嘯聚自昔然也熙寧九年春圍茂州刼畧吏民殺官兵劍南諸城騷然震驚夏四月乃詔資政殿學士諫議大夫馮公自涓徙成都以鎮撫之蜀人聞公之風舊矣歡喜踊躍迎擁於道公既至則一切鎮以無事憂者釋然駭者晏然隴畝市里按堵帖息王師徂征以畏以懷崑居澗飲悉復故處乃賦田器給種食以振業之莫不稽

顙厥角洗心易慮要神而誓曰自今以往不復敢干王
略矣公以為武威即申文教不可後也崇飭學校以紹
文翁之隆講明中和以追王褒之盛宣恩德問病苦方
且與蜀人相安從其俗以為遨嬉會未暇皇而蜀人亦
欲偃公之休恃以涵養以永歲月冬十月即拜公給事
中知樞密院事圖舊德以急親賢也於是蜀之在官者
及其學士大夫相與采民之言作為歌詩序引以獻曰
公其不終惠吾蜀而遂東邪又曰公雖東當澤天下於

何而不終惠吾蜀也凡若干篇以美以歡以致其誠愛
歟然若猶以為未也干旄之詩曰彼姝者子何以畀之
其是之謂乎公且從容上前日道其詩之所云興民之
利而除其害則衆君之作豈特贈離紀別之為哉蓋有
以補治道而致和理也

送益牧王宥學朝覲序

張俞

虎豹伏於山林鯢鯨遊於江海夫以搏擊蕩躍之性據
淵險勢勝之場固其宜矣一旦虞焚其澤漁絕其流則

狂顧駭羣震溢山海毛介之族雲擾電逝豈罟網之設
能制其暴哉况鳴弦張機動危其性彼聞楚然之音則
有覆車觸舟之患矣豈暇翔擇而後處耶牧民者亦然
益為西南之都會外戎內華地險物侈俗悍巧勁機發
文詆窺變怙動湍涌熾馳豈其性哉守之者非其道也
往歲三困盜臣之暴故其民翻然得計自爾三十載或
政失其養則緣隙乘險欲躡前弊而復其怨得非駭逸
之過乎是以詔教服御與天下異樞密學士太原公既

持其節鎮其地運方畧以適其欲宣上德以滋其生緩
征賦以豐其財肅刑以平其枉逮二年黎俗淳阜獄訟
寂寥和氣休聲溢於道路俞遂作蜀侯賦政詩以歌之
今我侯以旂節朝于京師俞適在岐陽且聞侯之去蜀
其國士大夫曰兵曰民咨嗟瞻嘆千里不絕好文雅者
又競為詞章惜侯之行且頌其用信謂君子為龍為光
有始有卒者也俞雖流冗不能忘乃作詩一百六十言
又為序以為送元侯蘊神畧仗鉞靜坤維道冠九州牧

情通八國更金城全失險鳳鳥此來儀印佩涵星斗牙
兵肅虎貌旄頭沈怒角彗尾滅長旗號令招文物功庸
煥鼎彝言朝紫微座行陟上台司嶽峻神靈氣風清袞
職詩雙旌浮日轉四牡逐颺馳馬首壺漿滿梯空劍閣
危玉鸞鳴漢目珠珮照秦姬過陝懷棠樹經周歎黍離
節函龍天矯詔檢鳳歲蕤霽聳浮雲閣春流象壁池巖
廊通夢想海寓識雍熙回睠西南國行謠滿荔枝

送趙大資再任成都府詩序

文同

上五年秋七月丞相以成都守臣當更其所以宜往者
名氏陳於上前曰是其職序才業皆可以稱其任惟上
之所擇者上凝神久之且曰今海內之蕃域號為至重
者舉莫若吾之全蜀壤土衍沃民俗豐夥外之則八國
種落賴之以綏輯內之則四道郡邑倚之以康靖得人
而重固異他所須智畧沈辨威惠肅給厭輿論之所與
慰遐邇之所欲者始為其人矣我有耆哲宛在東土是
嘗屢以仁愛明恕撫吾西南之民其民懷服其信厚逮

今未聞有輒敢一日忘者此將煩之再蒞於彼其謂往
制無循襲丞相奉上旨乃聖慮所及度越常議選委良
帥以遺井絡遠人蒙慶不勝至幸於是以資政殿大學
士召公於營丘大旆過詔趣見上衆志謂公輔臣必以
遠辭既對便坐獨奉天語雍容啓問移漏累刻惟以願
得亟裝出都門并驛臨治以副上之所以待下之意訖
不以私請自免以圖便安遂行上褒嘉之馳使勞諭眷
委之厚無與為較先是公二紀之中臨於蜀蜀人既聞

公來男呼於道女謹於竈皆曰我之匙筯安於食而枕
簞樂於寢者不圖今日復因於我公也公既至簡條目
去苛異刷滌梗垢磨盪昏瞽羣疑革而冰消大擾息而
波澄未逾月而梁岷之下晏然已為樂國矣同昔者嘗
聞之於公曰夫感物患乎有心有心則接於物也泥而
不博臨理貴乎無欲無欲則燭於理也明而不闇泯諸
妄慮照以正見則天下之治安有所謂齟齬而難治者
哉蓋公素事如此以為身術故入匡巖廊出殿巨屏曾不以

內外為輕重而一以其所無事者為政治之本凡取知於君而獲愛於民者其將繇此者與同常欲有所論譔以紀公之休懿會赴官興言道出門下公因授以送行詩一篇俾同為之序乃述上之所以復用公於蜀與公之所以得蜀人之歡心者題其篇首詩自韓魏公而下凡若干章云熙寧六年上元日謹序

代送席帥序

楊天惠

上即位之七年詔以吏部侍郎席公為顯謨閣直學士

知成都府公少遊蜀道登鹿頭望雪嶺沿雁浦尋江源彷徨周覽山川形勢而得其豪傑者舊主名與其風謠氣俗之詳及是命固樂與西南為不朽事既練日即引道而蜀人亦以公名卿子清毅有故家風度必能舉廣漢遺烈倡方面之治於是開府之日小大趨令民各順聽亡所抵牾老奸宿惡閉門束手念自淬厲求為柔人而益利兩道二十餘州水芸火耨山行野負之氓咸足生理抃喜盈望如公戶摩撫而人勞苦者蓋公設施百未一二

而治功已如此矣公遂勤成之行之不變凡幾年治益
進功益章天子以公名實相應果可用不疑也亟下璽
書召焉方坐宣室開延英從容賜對天下事因空紫樞
闥黃閣以時贊授無不宜者回視前日風憲之拜銓衡之
遷猶不足淹步武況牧伯之寄岷益之遠是尚能延駢
馭耶某節下小丈夫也試吏小邑幸得操簡書受約束於幕
府公不知其亡狀時賜之坐訪所欲言某亦憫然思自單
竭陳義未竟公必知其所以然至乃未言而蒙識察不

竭而承知遇士大夫竊怪之而公處某常自若也今公
還朝廷某賤不及從迎計歲時不即獲侍如出帡幪暴露
於外如去清陰何恃而安雖然鼎鉉之材當為巖扉重主
瓚之器宜為宗廟珍以一方不可獨留也某小子寧能久
怙耶用是自決無限望秋風已壯嚴召方急某願公以天
下之重自重而不敢有所祈謹抗手抑首遷延而辭避

送成都席帥序

王賞

席公治蜀之五年詔書移鎮平涼賞送別於昇仙橋上

而言曰契丹大國也中國奉幣交懽為兄弟靈夏小國也臣服於中國大國富強其勢為難動為中國之患大小國迫蹙其勢為易危為中國之患小然契丹自澶淵講盟慶厯再和之後北邊無狗吠之驚者百有餘年夏人自元昊以來服叛不常五路宿兵而內引百羣為助敗兵蹶將困於飛輓者累世而不息此其故何也今日契丹破滅議者謂西方可傳檄而定是亦弗思耳以前日之勢觀之為患大者反無足憂為患小者乃深可畏無

足憂者易亡則知深可畏者為難取也大抵國大則有所恃而不戒位分太嚴而上下不交法令太急而百姓不附故其強易弱國小則無所恃而常懼其軍民之勢猶一家也相卹相救謀慮日深故其弱難犯平涼四面無險阻號用武地若朝廷無深入之計為守而已則可若欲求朔方故地則為執事者不可不慮古之人欲謀人之國者必有素定之策伍員之於楚分兵以肄之充國之於先零持久以服之夫無謀人之智而使人疑之

拙也有報人之志而使人知之殆也事未發而先聞危也況夏人今有屑齒之憂耶為今之策匿影撤備使之勿疑焉而後可以有為也賞將有深於此者而未敢言焉

送符制置被召序

何耕

二十五年冬上召四川制置使符公於成都明年春命始至公以次付使事府事理裝戒行日於是賓佐掾史雜然相與懷公之德惜公之去往往有不懌者獨其客

何某揄袂奮臂抗聲於衆曰公召宜也已後矣公早揚
俊聲雄辭大篇甲乙上庠繹史緒經強記洽聞貴而彌
專老而不休於時為耆儒登車澄清擿伏糾貪風烈巖
巖嚴而不殘徘徊巴蜀十有餘歲最後以太府卿總四
路之賦國用以饒軍無乏食厥功茂焉於時為材使者
蜀道謀帥帝難其人峻秩西清命公往臨別蠹治荒公
不敢踰田婦販夫知公勤勞於時為賢方伯今天子總
攬萬幾躬行福威舊德名人登用無遺者万俟公來自

沅州至之日拜右僕射魏公沈公相繼起遠外位政府公
視數公皆一體人也顧安能鬱鬱久居此乎與其利專
於一方孰若澤被於天下與其擁旌仗鉞為蕃宣保障
之用孰若垂紳搢笏有謀謨規誨之益故曰公召宜也
而吾徒尚何以戚戚然兒女悲為哉雖然蜀父兄有蓄
念於此久矣不敢徹聲於天子而敢私布於下執事公
其聽之否乎自秦丞相當國逐蜀士如棄梗無一人綴
文石之班望屬車之塵者或曰謂其輕而黨同丞相惡

之故弗用嘻亦甚矣百步之內必有茂草而謂蜀之人
人人皆輕人人皆同也不幾於誣乎兩蘇公兄弟也伯
氏以言語得罪瀕死不悔而其季淵靜木訥出於天性
蜀國范公與溫國司馬公平昔議論無一不同至論樂
律則終身不能相合也其不輕不同者亦可概見矣或
曰蜀地踈遠丞相忌之故弗用此又非也宰相之用人
當問其賢不賢豈當計其踈不踈遠不遠耶今有橫木
於道當舉以十夫之力則取諸吾鄰里鄉黨而足矣至

於當舉以千萬夫之力則取諸塗之人可也而必曰吾
之父兄子弟焉吾之鄰里鄉黨焉則木之橫於道者沒
世不行尋常天下之大過於橫木亦遠矣而宰相方且
惟踈遠之務去嗚呼殆哉蜀父子竊竊然不能忘情於
是者有以也夫側聞万俟公頻年於外涉艱阻知情偽
甚熟恚今其還宜必有至公甚盛之觀以懲創前弊慰
安羣心者而沈公亦嘗為政於梓於夔所至有惠愛既去
人思之今公又自蜀以往天下其意者將振蜀人於二

三公之手乎未可知也公既見天子於殿陛上退而與
万俟公魏公沈公論天下事孰通孰利孰病其能漠然
無一語於蜀哉盖非今日庶政一新公道廓開之秋則
公雖有欲言之心而不可以言非公與沈公在蜀日久
凡觀民風考論人物之詳則蜀人雖抱無窮之恨而不
敢以告語曰日中必隳操刀必割盖言時之不可失也
公行矣嘗試為蜀人圖之


送牟秉常先生序

明周洪謨

予叙郡人物自漢以來見史傳者固非一人惟宋程公
許忠信孝友出於天性史深褒之特以抗直不阿故屢
遷華秩而輒屢斥然而公許始終一節不變所守雖古
直躬之君子蓋不過焉今秉常先生公許里人也其才
敏迨公許而直諒亦似之永樂乙未舉進士入翰林為
庶吉士五經諸子百家之書靡不讀而過目輒成誦一
時輩行皆多其博洽自以為不可及暨授監察御史彈
劾無所避未幾有忤權貴銜之中以法謫戍遼東繼徙

張掖棲遲乎沙漠不毛之地二十年于今矣邊帥以下
皆器重之先生砥礪日閱經史至忘寢食暇則賦詩草
書故其詩益工而草益精近歲為邊帥所薦始復其冠
帶仍給事邊閫頃之以公務來京師既而與故交留詩
別搢紳大夫和之者凡若干首茲復以使至乃集詩而
俾予序之嗚呼先生久詘矣信孟子所謂困心衡慮而
又甚焉者也予讀先生之詩未嘗不為之於邑而觀者
或謂其悲悽之至殊不知三百篇之可以怨者皆出其

性情之正而無尤焉先生之詩亦猶是爾古之君子內
舉不避親外舉不棄讎安得若人者起先生於荒陬乎
況今上勵精致理下詔求賢不棄側陋倘有薦者則束
帛之徵在旦夕焉因書此以識別



全蜀藝文志卷三十二

欽定四庫全書

集部

全蜀藝文志卷三十三

詳校官內閣中書臣李采

侍讀臣孫球覆勘

總校官進士臣繆琪

校對官中書臣李荃

謄錄監生臣王焜

欽定四庫全書

全蜀藝文志卷三十三

明 周復俊 編

記甲

南門記

唐張延賓

崇高莫大於君親嚴莫大於父君有覆幬父有訓育逮
於夷貊生知禽獸性感不俟教解也而肖形之內戾氣
間存觸瑟生災夢牛成患何代不有可勝言哉賊眚焚
門亦由是也族滅門覆為愚者鑒誠所以書其所由來

其餘則詞存於左右壁矣興元元年記

創築羅城記

王徽

皇帝改元之六年諸道鹽鐵轉運兼鎮海軍節度等使
開府儀同三司檢校司徒同中書門下平章事燕國公
高駢奏臣前理成都築大城請記其事上命翰林學士
承旨臣王徽授其功狀臣徽承詔再拜上言夫外戶不
閉雖前聖之格言設險以居乃有國之雄制用是則光
昭振古勢聳遠夷不有高墉曷稱巨屏我之奧區粵惟

井絡繁阜昌熾標出宇內先是蜀城既卑且隘象龜行之屈縮據武擔之形勝里閑錯雜邑屋填委慢藏誨盜城而弗羅矧乎西東江山南控烏潯疆理瀕洞密邇舊貫因循日居月諸殆逾千祀漢魏以還英豪迭處至若公孫述之桀黠諸葛亮之經營曾不指顧留心乘機制禦斯蓋天威盛烈神貯嘉謀俾集元功式耀雄武自二紀以降邊鄙戒嚴有虧懷柔或阻琮賁雖負山川之險且乏金湯之固上顧相臣曰朕以不德化罔被於四夷

惟是西南載懼倣擾深軫予衷將若之何丞相進曰陛下以睿哲照臨臣輔理臣不能敷聖澤以懷異俗俾流毒於益人臣之罪也然黃帝有版泉之役放勳興丹浦之師周逐玁狁漢備匈奴是知猾亂自古皆有其所以滌厲梗致時雍乃在進任忠賢馳驅英雋耳臣伏見今天平軍節度使駢即威武公崇文之孫也威武在元和中屬闢以蜀叛憲祖殷憂擇其所以伐之者由是允膺聖獎能以部兵復梓州統大軍平玉壘大節大忠煥乎

典冊駢能不墜其業益大其門既席勲烈之資克擅匡
扶之志材超衛霍氣蓋關張忠孝兩全河山繼誓聿修厥德
自成名家馳譽石麟焯有美稱出守天水邊塵不驚戎
律既申將略克舉俄而交趾淪陷有命遄征既復土疆
遂錫斧鉞則馬援銅柱楊僕樓船步驟之間莫得倫比
固以威張惠浹後勁中權五年於茲海波不動朝廷方
期拔用不可久留爰命徵還彌增寵澤時屬龐勗始潰
鄆方未寧駢則再登師壇復開將幕士絕朝飢犬無夜

驚威加鄰部化敷屬城相印以之疇庸和門為之增氣
恭以憲宗錄崇文定蜀之勲也既如彼陛下念駢復交
理鄆之勤也又如此俾榮舊履重建高牙必致師貞可
期俗阜上曰俞爾惟代天其行之於是詔駢復以丞相
擁節去汶陽趨錦里至則詢問疾苦樹置紀綱巡按封
域周覽郭郭且曰夫療疾者必在藥乎心腑然後可以
堅四支植木者必嘗澤乎本根然後可以茂柯葉今城
之於蜀其由心乎其由本乎則知不理於近曷能致遠

不固其內安能保外未有不謀而能成不壯而能威不
勞而能逸者也於是擇將量材拓開新址分命支郡以
令屬邑乘時就役靡不適中吏不敢欺人不敢怠岷峨
之下忻忻子來昔梁伯亟城人疲弗處子囊築郢見誚
於時曷若駢能度其宜樂用其士圖難於易去危即安
環以大城用冠諸夏其功固已相萬矣惟蜀之地厭土
黑黎而又磽确版築靡就前人之不為非不為也蓋不
能也惟駢果得衆心克大成績鳩工揆日不憊於素十

旬之中屹若山峙南北東西凡二十五里擁門却敵之制復八里其高下蓋二丈有六尺其下廣又如是其上則袤丈焉陴四尺斯所謂大為之防俾人有泰山之安矣而甃碧塗墜既麗且堅則制磁飾頰又奚以異其上建樓櫓廊廡凡五千六百八間椀栢櫛比闐闐鱗次綺䟽掛斗鴛瓦凌霄若翔若飛如偃如仰栖息烏兔炫煇虹蜺龍然而紫霞然而橫望之者莫不神駭而氣聳目眙而魂驚其始也咸謂冥助似非人力其外則繚以長

堤凡二十六里或因江以為塹或鑿地以成濠則方城
以為城漢水以為池又何以加焉是知摩壘者不復矜
其能擊柝者足以抗其敵所謂能禦大菑能捍大患者
也其舊城周而復始蓋八里高厚之制大小之規較
其洪纖可得而辨矣況乎扼東都會襟帶地形險易之
狀斯呈強弱之力可見自秦惠王䟽翦山林以通中夏
及李冰為守始鑿二江以導舟楫決渠以張地利斬蛟
以絕水害沃野千里號為陸海由冰之功也漢文翁置

學校勸人受業行俎豆獻酬之禮於是儒雅之風作洎
威武伐叛擒大憝而新其人玉石不得俱焚焉兩蜀至
今稱之駢之來鎮肇興武備倣有禦衝之事夫然後不
為外羌之所窺矣惟蜀之人自冰與翁自威武暨駢乃
獲佑於天者四天之於蜀厚矣長雲斷岸莫得而隳古往今來
何嘗能覲傳不云乎人保於城城保於德觀駢之政可謂保城
與人矣向非挺生俊傑來弼聖神則孰能建絕代之遺功創一
時之偉績者乎況夫高不可踰堅不可觸俯瞰天表方

駕馬足銷吞侵沴亘壓咽喉訖使豺狼耳之而色沮目
之而膽褫是謂不爭而勝不戰而服者也新城成詔加
大司徒封燕國公旌殊休也重以崔苻充斥荆楚傷夷
遂假威望茲用底寧弓矢專征銅鹽劇任安危攸繫一
以委之往哉荆渚荆渚既清又徙金陵金陵以平救鄢
郢之剽殘拯江湖之焚溺期月之內罔不樂康若乃考
其才稽其用所至難息所施利興智無不周技無不達
韜鈴裨闔固自生知詩禮幾微雅當師逸雖羽書疊至

應用如神加以詞鋒莫前筆力道勁屢獻平戎之策每
陳憂國之忱抑又城府坦夷器宇冲邃祿利不盈於私
室夙宵無怠於公家段頗在邊未嘗蓐寢羊侃待士靡
顧囊裝崖岸不可得而臻波瀾不可得而際矣所謂社
稷柱石川嶽英靈者也則知駢如何臣城如何功嗚呼
天贊其謀地襲其固非吾君不能用其材非臣誠不能
就其事故曰為可為於可為之時則勲乃見城由駢而
成駢由君而聲城既牢矣人既休矣宜乎讚盛德之形

容叙勲賢之丕烈恭以操觚載事作者為難臣非其人
何以稱此將欲刊諸貞石寘彼坤維垂於無窮期乎不
朽屬詞愈拙染翰增慙銘曰

惟蜀之疆擁抱岷梁斗絕諸夏裂為一方啓達上國
聲自秦強壯者五丁導彼青冥鑿岩而梯飛棧以行
動猶鳥逝舉若猿輕漢人既遷言語乃通眇邈千祀
遂叅華風界彼邛滇靡設鍵關在古侵殘為蜀之艱
唐被聖德間仍凶慝猖狂逾紀吞噬無已艾獮焚驅

眊不寧居皇帝踐阼驚嗟震怒爰擇蓋臣推轂以付
時惟燕公撫俗訓戎碩畫宏規神輔其衷經始新城
心術潛形乃告編人版築雲興相彼井鄩觀於封部
調茲郡邑量其戶賦劃界指期莫敢踰度蜀人未安
待城以歡蜀土方危待城而威阡陌繩直門閭暴布
外聳風雲內扃貔虎卉木蔥蒨麗譙輝映戎馬夜寧
戈鋌盡靜蜀山藐藐蜀江滔滔寇不敢窺人不知勞
險而不煩峻而不譁去來出入嬉嬉一家燕公之德

其誰與鄰燕公之功式利於人德入人深功流不極勒
銘天隅為臣表則中和四年記

創築羊馬城記

李昊

粵若蠶叢啓國魚鳧羽化於湍山望帝開基鼈靈復生
於岷水然則疏鑿巫峽管鑰成都而猶樹木柵於西川
跨土田於南越其後兼并梁漢睥睨巴賁獵騎奔馳會
秦王於褒谷石牛來去闢蜀路於劍門空驚化玉之微
寧獲糞金之利爰自朔分秦厯聲接華風代有雄豪迭

為侯伯運當奇特子陽乘虎踞之機時遇非常昭烈負
龍蟠之勢若迺張儀之經營版築役滿九年楊秀之壯
觀崇墉功加一簣洎我唐臨御聖德昭融武威雷駭於
百王文德日暉於四海惟茲益部扼彼邛關蒙王包豕
突之心坦綽肆鴟張之志時或窺吾卧鼓覘我鞬戎彎
弧學射之山飲馬沉犀之水玉帛子女漂流鑿齒之鄉
珠翠綺羅散失雕題之域累朝是忘逸樂深軫殷憂夢
卜良臣控彈巨屏南康王以儒術柔服教習詩書燕國

公以將略威懷淬磨斧鉞息波瀾於錦水初制度於羅城踰百雉之恒規補一隅之闕事有備無患庇蜀人以金墉避亂蒙座安僖皇之玉輦雲蠻稽顙遣使來朝航滇河以獻珍越沉黎而納款當廟社阽危之際鑾輿出狩之秋坐制南荒終無北寇乃燕公之力也往以蒼穹告變天祿中微夷門方轉其斗魁王氏遂分其鼎足既而莊宗繼絕皇祚中興靈旗西指於巴庸蜀主東朝於伊洛先帝以初復地方懷遠人須仗權謀廼旰食於

是詔飛丹鳳召何晏於并門節立蒼龍封杜棕於并絡
即我大尉侍中平原公分茅金闕受瑞彤庭帳移竹馬
之邦輪輶木牛之路星馳十乘霧廓三川宣皇風於上
事之初慰人望於下車之日且以城邑自經尅復勢尚
搔搔公來如太華之安帝寄得磐石之固益民多福而
遇賢侯公曠度涵空英風擴古襲門胄則重侯累將保
勲榮則帶河礪山會族而象簡盈牀奕葉而貂冠滿座
其為盛也無得名焉頃者以龍戰玄黃虎爭區夏殺氣

晝昏於日月陣雲宵蔽於星辰天柱傾欹海波動盪鼓
輦未息干戈日尋公是時幹運璇樞端持瑤鏡贊神謀
於不測斷人事以無疑獻替經綸折衝樽俎決勝廟堂
之上制敵掌握之間借筮為籌舉無遺算內則翊戴天
子外則承寧諸侯言正色莊有犯無隱成少康祀夏之
德弼光武興炎之功再造巨唐削平新室厯數允集神
器知歸皆由公叶和元勳光輔洪業是知取威定霸崇
文教以興隆安上治民脩理容而鎮靜足以神交旦奭

事侔平參力致大同宜亨廣運以之首揚紅旆式遏錦
川古有遺機待乎作者公鎮臨之始年中興之四載也
歲在丙戌春正月十有一日杖鉞而至無何朞月逆帥
康延孝自普安竊兵叛亂矯詔窺覷犯我鹿頭營於維
縣勢將率衆必寇近郊公曰清野待敵於民何罪堅壁
而守謂我無謀況城雖大而弗嚴隍已平而可步衆情
憂泓公意晏如飛羽檄以會兵伐林木而立柵森然簇
戟密爾橫簫環以深溝屹如斷岸五日之內四面尋周

民一其心士百其勇於是精選將領分部熊羆電激妖
巢火熏狡窟一鼓而元充氣喪載攻而同惡疲頽擒鄧
艾於輜中斬龐涓於樹下長蛇碎首封豕析骸獻捷功
於王建掃逋穢於侯甸一除牙孽大定疆陲公於是提
振紀綱恢弘典法六條已正七德皆修言出令行家至
日見未幾先皇厭世今上纂圖聖政惟新睿思求舊不
改山河之寄永繫社稷之臣一年而加弭貂再歲而昇
掌武將軍幕下列虎豹之爪牙丞相府中非鴻鵠之腹

背猶且爵盈而不飲肴乾而不食診療生靈討論獄訟
固以忠為令德孝出因心力奉國家勤修職貢琛賁縈
紆於劍棧包茅旁午於玉京史不絕書府無虛目閱其
庭實標出羣芳推晉文尊獎之誠紹齊桓糾合之業天
子得以居南面之貴銷西顧之憂萬里長城岷然存矣
公一旦謂諸將吏曰夫華陽舊國宇內奧區地稱陸海
之珍民有沃野之利鄂郭則樓臺疊映珠碧星輝江山
則襟帶牽連物華秀麗間閭碁布鄧陌駢羅不戒嚴陣

是輕武備耳亂臣賊子何嘗不窺南詔西羌曾聞入寇
將沮豺狼之意湏營羊馬之城吾已揣之衆宜協力封
章上奏揆日量功分界繩基辨方畫址百城酋壯呼之
響答以雲來十萬貔貅令之風行以霧集杵聲雷震版
級雲排王猛鬻畚於城隅傳說飛鋏於巖下公間日巡
撫役者忘疲周給米鹽均頒牢酒如般五丁之力纔踰
三旬而成克就厥功不憊於素遠而望也象衆山之迤
邐俯而瞰也若峭壁之斗懸掘大濠以連延增長隄以

固護鷺鳥搏兮可越武夫勇兮莫干摩壘者諒之摧心
守陣者由之示暇舊城崢嶸而後竦新城崢嶸以前蹲
並而言之若泰嶽之與梁甫亞而稱矣若夫子之與顏
回重門開而洞深危樓亘而翼展至若八月之江澄寒
碧七星之橋架晴虹偉乎津梁成茲壯麗公以羅城雖
設智有所虧重築大敵鎮於四角欽岑掛兔崦嵫栖鳥
儼樓櫓於泱寥懸刁斗於天表其東南也直分象耳迴
眺峨眉雲霞斂吳楚之天煙水送夔黔之棹其西南也

旁連玉壘平望金隄宵瞻火井之光曉望雪峰之彩其東北
也樹遙雲頂氣鬱金堂雨收而疊嶂屏新靄薄而重巒晝暗
其西北也襟袖廣漢肘腋天彭魚龍躍萬歲之池鸞鶴舞陽
平之化其或碧雞啼曉金馬嘶風擁旄戟以登臨覩山川之
形勝有以見公心同軒鏡竄讐鬼神手秉漢鈞錙銖造化能
於昭代樹此豐功鄙金甌為漏卮小鐵甕為凡器具興也已
當農隙其罷也不害蠶時帝旨咨嗟王綸獎錄詔書勅知祥
省所奏重脩葺當府城池已取十二月一日興功事具悉卿

寵分玉節榮鎮錦城守富貴以無疆慕功名於不朽特峻金
湯之固以威蠻貊之邦况屬年豐復當農隙既暫勞而永逸
亦預備於不虞益見廟謀允符朝寄省閱陳奏嘉歎殊深公
猶歸善於君讓功於下諸軍馬步軍都指揮使光祿大夫檢
校太保守彭州刺史上柱國李仁罕左廂馬步軍都指揮使
金紫光祿大夫檢校司空守漢州刺史上柱國趙廷隱右廂
馬步軍都指揮使金紫光祿大夫檢校司空守簡州刺史上
柱國張知業等家傳義烈世襲丕勲托弓而霹靂聲乾揮

劍而魚麗陣破曹景宗鼻頭火出薛孤延髭尾煙生英
毅無儔智謀咸博左都押衙金紫光祿大夫檢校司空
守蜀州刺史上柱國潘在迎等或鼎鍾舊族或書劍名
門佩鞬執弭以從戎憑軾褰帷而至理至於華皓不墜
忠勞是能領袖雄藩表儀會府而皆躬臨卒列統攝底
工無楊干之亂行絕趙羅之辭役明興晦息日就月將
巨績告終羣才協贊自天成二年丁亥歲十二月一日
起工版築至三年正月八日畢手公再飛章上奏詔曰

勅知祥省所奏修治城濠畢功事具悉百堵皆興四旬而畢亘羅城而雲矗引錦水以環流外禦蠻夷中權幃幄公家之事相業可觀備覽陳奏殊深嘉獎於以表綸綍褒揚之寵知朝廷倚注之恩其新城周圍凡四十二里竦一丈七尺基濶二丈二尺其上濶一丈七尺別築陣四尺鑿壕一重其深淺濶狹隨其地勢自卸版日構覆城白露舍四千九百五十七間內門樓九所計五十四間至三月二十五日停運斧斤其版築採造軍民共役

三百九十八萬工其執事餽糧及役罷賞賚斗支稱給
緡貫囊裝其數凡費一百二十萬其諸將大校出良駒
於皂棧解重帶於腰圍選其纖柔釋其好玩曾無顧愛
一以頒酬其縣大夫及寮佐已下或賞之器帛或給以
緡錢咸有等差不無均普公即奢從儉節事省財馬如
羊而不入私門金如粟而不藏私橐患肆公家之利盡
充王事之資圖有謂之功非無度之費也公誠欲為而
不載朴而無文衆意未然墻進固請四民喧闐於衙閭

萬口號沸於堦墀父老曰公侯政治神明慈如父母前
年定延孝之亂今歲防蠻蜚之虞盡力城隍務安井邑
遂使我等保家庇族養老寧冲如是者功德在民憂勤
報國安可不叙述休烈雕篆貞珉豈不美歟何容辭也
公謂諸賓佐曰抑聞乘人之約義士猶或不為貪天之
功智者宜然不取所修邊備式耀國威將欲罄臣節於
一時彰帝猷於萬古殊非已力難遏人情誰當游夏之
才請紀見聞之事具相門牢落堂構蕭條翁歸文武之

材明時待問苟息忠貞之志暗室不欺寐酣而白鳳昂
藏染翰而墨龍夭矯嗟乎鄧禹秉鈞之歲雖慶承家
陸機赴洛之年不堪觀國空餘壯節退卜良知驅車幸
返於故園提筆謬登於華館金臺玉帳敢差俊彥之肩
綠水紅蓮獲繼鵷鸞之踵酷慙薄技莫贊雄猷杜征南
以矜大平吳沉碑漢水實車騎以章明出塞勒碣燕山
猶能炳著簡書發揮功業寧偕巨制永固坤維尚乏黃
絹之辭孰拂白圭之玷受恩稟命紀事表年巍巍乎不

騫不崩何患於為陵為谷

城地記

明安磐

吾州介山水中西北刊山為城東南濱水而堤堤即城也城東一水自北來曰江水城南一水自西來曰青衣水自西南徼外來曰沫水三水皆迅急皆會州東南皆能為州城患而沫為最夏秋之交常平城秦李冰鑿離堆以避其患唐韋臯鎮蜀時伐凌雲以殺其怒宋麴紹作斗門以走其暴凡以節茲三水也嘗聞之父老云永

樂中州學在岸南數十步以今計之正當中流決嚙遷徙可知矣正統中郡守段公鑑防以杉柵成化中郡守魏公瀚障以石隄自是乃得不徙州人賴焉者數十年歲久而木朽石傾而地削州人於是復有憂色正德六年安成胡侯準以能名自維摩移守茲土屬搃賊亂東北重以內水之變州縣戒嚴吾州人之可憂者又有出於三水之外侯時調集兵餉日不暇給乃別駕秦隴胡侯績宗奉檄脩城城立而盜不敢近別駕升秩去雨水

壞城十六七侯曰予辱守土其可使茲無城乃謀父老
及大叅童公瑞侍御徐公文華暨磐曰予將城焉又曰
自用兵來所在皆城然輒壞屢役不止予將城焉而俾
可久又曰州人病矣公帑有金儲倉有穀予惟藉其力
焉童公而下咸曰惟侯幸惠我嘉人乃上其事總制少
保彭公澤巡撫都御史馬公昊巡按侍御王公鏜方伯
胡公宗道大叅邵公賁少叅盧公綸僉憲郭公東山悉
從侯議而郭公主張助成為尤力侯乃率執事者矢之

神曰必期率事無踈緩乾沒者有幽罰八年中冬望日
始事掘地深八尺萬杵齊下砌石厚凡八尺以附於上
編柏為柵以附於石柵之外仍衛以土石自柵而上東
城高凡十有四尺南城高凡十有六尺厚則以漸而殺
上置女牆高凡五尺延袤凡六千餘尺凡石必方整合
石必以灰一石不如意者雖累數十石其上必易如其
令者賞違者罰人人感侯之義莫有毫毛苟且為心者
功半大水卒至叫跳衝擊漫漫者三日州人相視失色

欽定四庫全書

全蜀藝文志
卷三十三

既水落城石無分寸動移者民益歡呼牽引赴事或至
夜分重以澧陽汪侯儉受侯代至亦相與成之於是茲
城凡八閱月而成其西北二方之未城者則汪侯之任
也四方來觀者咸曰壯哉斯城未見也父老曰段侯以
木魏侯以石胡侯實兼之城如是焉世世夫何憂且侯
用財當而運謀審待物誠而集衆惠又能不畏騰口成
茲大功不可不記以垂無極因以記委磐謂侯在州之政
皆可書而茲其大者故記之是役凡用萬人木工百人

鐵工五十人石工一千三百人皆計日而給餼與直鐵萬斤栢萬株灰百萬石石百萬餘片運石之舟百艘白金二千五百餘兩米一千餘斛帑儲之外侯之區畫居三之一焉於時別駕南安郭君廣徽山任君倫賓贊泰州趙文峨眉主簿章丘閻忠威遠訓導茶陵李棕或叅其謀或理其事皆於茲城有功而執事董率之官與民皆遴選而勤勞者則以名姓附之碑陰

梓潼移江記

唐孫樵

涪繚於鄣迫城如蟠淫漲於秋狂瀾陸高突堤嚙涯包城
蕩壚歲殺州民以為官憂滎陽公始至則思所以洗民
患頗聞前觀察使欲鑿江東壩地別為新江使東北注
流五里復匯而東即堤墟舊江使水道與城相遠以薄
江怒遂命武吏發卒三千跡其前謀役興三月功不可
就有謁於滎陽公曰公開新江將扶民憂然江勢不可
決訛言不可絕公將何以終之滎陽公曰吾欲厚其直
以勸其卒可乎對曰飢卒賴厚直民惜其田以覲得不

可滎陽公曰吾欲戮其將以動其卒可乎對曰代之將者必苦吾卒卒苦叛不可滎陽公曰奈何對曰夫民可與樂終難與圖始固自役興已來彼其民曰夏王鞭促萬靈以導百川今果能改夏王跡耶非徒無功抑有後災羣疑牽綿民心蕩搖前時觀察使欲鑿新江中輟議而罷豈病此耶公即能先堤民言新江可度日而決也滎陽公諾明日視政加猛決獄加斷又明日杖殺左右有所貳事鞭官吏有所阻政者遂下令曰開新江非我

家事將脫鄰民於魚禍耳民敢橫議者死鄰民以滎陽公嘗為京兆既憚其猛及是民心大慄羣舌如斬未幾而新江告成滎陽公歡出臨視班賞罷卒已而嘆曰民言不堤新江其不決耶新江長步一千五百闊十分其長之二深七分其濶之一盤堤既隆舊江遂墟凡得田五百畝其年七月水果大至雖踰防稽陸不能病民其績宜何如哉滎陽公既以上聞有司劾其不先白詔奪俸錢一月之半樵嘗為褒城驛記恨所在長吏不肯出

毫力以利民觀滎陽公以開新江受譴豈立事者亦未
易耶是歲開成五年也

龍多山記

前人

梓潼南鄙越五百里其中有山崛起中天即山之趾得
逕委延舉武三十北出其巔氣象鮮妍孕成陰煙屹石
巉巉別為東巖槎牙重複爭先角逐若絕若裂若缺若
穴突者虎怒企者猿踞橫者木仆挺者碑豎又有侶乎
飛簷連軒櫟欂交攢歌撐兀柱懸棟危礎殊狀詭類愕

不得視下有畝平砥若戶庭攄乳側脈膏渟泓石俯對
絕壑杪臨蘭薄仙臺標異藪石負起屹與山別猿鳥蹟
絕腹竇而空路由其中斷齧相望攀緣上下闐然而出

曜見白日始時永嘉飛真益羅

相傳永嘉中有益羅者於此臺上學道益

羅於此白日上升今臺下有碑誌存焉者也

玄蹤斯存石刻傳聞丹成而蛻

駕鶴騰天一去遼廓千載寂寞澄泉傳靈別壑絕明風
間境清寂寞無聲嘉木美竹岡巒交植風來怒黑雷動
崖谷山禽喙獸捷翮互驚曉吟暄啼聽之悽悽迴環下

矚萬類在目因山帶川青紫碧聯莽蒼際天杳杳不分
月上於東日薄於泉魄朗輪昏出入目前其或宿霧朝
雲糊空縛山漠漠漫漫莫知其端陽曜始浴徹天昏紅
輪高而赤洪流激射濃透薄釋綿裂綺拆千態萬狀倏
然收霽樵起來而遊泊車而休登降信宿聞見習熟始
曰山乎曾未始有得乎無處夸世釣名者污此巖扃乎
且欲聞於潁陽之徒乎

導水記

宋吳師孟

最爾小邦必有通流之水以濟民用藩鎮都會顧可闕歟雖有溝渠壅閼沮洳則春夏之交沈鬱湫底之氣漸染於居民淫而為疫癘譬諸人身氣血并凝而欲百骸之條暢其可得乎伊洛貫成周之中汾澮流絳郡之惡書之濬猷澮禮之報水庸周官之善溝防月令之導溝瀆皆是物也按史記蜀守冰鑿離堆穿二江成都之中皆可行舟有餘則用溉然則成都水行其中尚矣自高燕公駢乾符中築羅城堰廩粟分江水為二道環城而

東雖餘一脈如帶潛流於西北隅城下之鐵牕涓涓然
閨黷所及不能并蒙於一府歲久故道迷漫遂絕以故
氣象枯燥而草木亦少滋澤其五門之南江及錦江二
水之名最著而渠稍廣且汙瀦填闊或濺或漚則編戶
夾街之小渠可知矣間有鬱攸蓄以無水故艱於撲滅
鄉雖以甕貯水為備然器小而善壞非應猝救焚之具
故水不足用當平居無事時遑卹氣象湮塞之生疾而
火災之為害歟自丞相呂公及今戶部尚書蔡公深惻

民患欲尋故道以達之而所遣吏類皆苟簡不能體二公之意中作而罷今寶文王公勤卹民隱目睹水事惻然疚懷博訪耆艾得老僧寶月大師惟簡言往時水自西北隅入城累甃為渠廢址尚在若跡其原可得故道遂選委成都令李偲行視果得西門城之鐵牕之石渠故基循渠而上僅十里至曹波堰接上游溉餘之棄水至大石橋承以水樽而導之其水樽即中原之澄槽也自西門循大逵而東注於衆小渠又西南隅至密務前閘

南流之水自南鐵牕入城於是二渠既醺股引而東派別為四大溝脈散於居民夾街之渠而輻輳於米市橋之瀆其委也又東匯於東門而入於江衆渠皆順流而駛有建瓴之勢而無激蓄之虞回祿之患隨處有備又頗得以漱澣湔濯焉歲或霖潦脫有湔湔唯徹澄槽則衆渠立濇矣凡為澄槽二木閘三絕街之渠二木井百有餘所而民自為者隨宜增減不可遽數焉經始於仲春迄成於季秋言時計功盡如其素不妨民田不勞民

力不逆地勢而興除亡窮之利害古之所謂有功德於民者宜無間然彼王褒紀三篇之績廉范播五袴之謠乃一時褒德之美言與夫千載澤民之實惠可同日而語哉謹書其可以備來者之詢考云

淘渠記

席益

唐白敏中尹成都始疏環街大渠其餘小渠本起無所考各隨徑術枝分根連同赴大渠以流其惡故事首春一導渠歲久令瀆遂懈而壅大觀丁亥冬益之先人鎮

蜀城中積水滿道戊子春始講溝洫之政居人欣然具
畚鍤待其行部使者議於臺俗子之無識者謗於里令
既不知不可遏則又曹耦相與語曰祇論開濬積泥通
達可若何先人聞之笑不為衰止既汙泥出渠農氓爭
取以糞田道無著留至秋雨連日民不告病士夫交口
稱嘆多向之議而謗者也後三十年益忝世官以春末
視事夏暴雨城中渠湮無所鍾洩城外堤防亦久廢江
水夜汜西門由鐵牕入與城中兩水合洶湧成濤瀨居

人謹趨高阜地亟遣官犍薪土塞牕決小東門水口而注之江僅保廬舍又春夏之交大疫居人多死衆謂汙穢熏蒸之咎嗣歲春首修戊子之令邦人知疇昔便利無異辭且補築大西門外隄役引江水入城如其故而作三斗門以節之舊走馬承受廨舍之南克寧第一營壘之北有汙池積水日深大南則吞街衢為一池行人不戒誤蹈犯歲有死者鑿此池挹池之盈以匯於大渠築短垣以護池岸茲患遂弭是歲疫癘不作夏秋雨過

道無涂潦邦人滋喜益謂僚吏歲二月循行國邑通達
溝瀆毋有障塞此王者之政令長民之所當務也且前
事可師獨廢之何對曰淘渠之令歲亦一舉行里胥執
府符為醉飽左契爾如豪舉之室屋權要之官寺誰敢
掊視其通塞者編戶細人慮不及遠每早夜叫呼於門
得所欲即去間有欲問者患不知其原委詢諸吏民各
懷私意莫肯以實告故因循至此益曰今歲繪為圖以
從事矣圖可據乎皆曰圖如不可據則時雨既降必有

受弊之處今積陰如霽衢路如汜掃是圖之功也蓋曰
邑之有溝渠猶人之有脈絡也一縷不通舉體皆病按
圖而治之則纖毫無敢鬱滯者矣蓋刊圖以示後之君
子如有志於民意誠欲令信於斯圖也將有考焉

後谿記

李新

大皂之水由羌域中來裂地擘山下關岷水東分為沱
西北注成都離為內外二江其一自小橋入都市有篤
淵建昌安樂龜化等八橋跨水高駢廣羅城徙內江繞

浮

關

南之萬里橋回內江自洛陽

關三

東郭俱匯於合

水尾其後溝

關二

塞圃亡灌溉人多

關

厲天災流行萬

井皆涸不舒不洩物無精

關二

師魯公曩鎮全蜀使治

水者循大皂之源得會仁濯錦二鄉使

關二

水自曹公

堰導小渠承以木樽環武庫至西樓獨府第有水而

關

中無水太師魯公曰城皆吾家民皆吾子一草一木皆

國中之利

關

清流不

關

何示不廣復鑿水谿於閱武堂

後入諸郡使者之寺與

關

帑藏所在園

關

衡

關三

派決

均受漏泉之賜邗前日桔槔抱甕

闕三字

隋

闕四字

涇數斗

之泥風回漪漣過靈河九里之潤公

闕三字

歸

闕

帝舜游

石

闕二字

三十年矣後人簡

闕

谿亦不治

闕

龍學上

闕

下

事布政諮

闕四字

作新奇盡循太師魯公之治數月而政

成濬開後谿故道水行如昔邦人驚喜再還舊觀且楚

為掩

闕三字

鳩

闕六字

堰瀦町原防以授子木君子猶以為

禮是溪之成忌者

闕

修怠者不修乃指為燕遊張本決

不知廣澤一方備豫後世前人自有妙意某江山褫魄

老不能書事緊論始終以待久遠考

闕公梓州中

江縣新

闕九字

文同

闕六字

縣為江州所環因名之其

闕五字

綿之

闕二字

鹿爬山初若二帶其深財漸車至神泉始與

諸谷

闕三字

會為

闕

西至於羅江南至於陽平

闕

東南復

吞旁流迺浩漾為洪波

闕

於縣之西郊歷

闕字

勢

闕頗

闕二字

南注折而東斗且闕逐鴈擊左岸

闕字

善崩歲歲

內蝕若剝以刃若掃以帚邑人懦恐弗安厥居治平二

年春河內廖君子孟為

闕

今將解去尚訪遺敝及此即

行視嘆曰是將禍闕後者夫吾下為地陂而民魚有日

矣於是料材課工趣闕成期補垣墊漏填築堅闕以循

公而推乾之其夏大雨降潦屢闕至此力一闕迺施讓

行復

闕二

道

闕三

譟踊躍

闕三

德

闕八

之

闕七

利遺民

民至於今神祀之吾廖君殄水害於吾邑吾邑之人又

將何以報之哉謹當戒告子孫即其地以祠世世不敢

忘也君聞之笑曰過矣此非所以盡吾之所為者曷足

以云爾之德耶貢士賈汝奇等二百人還然進而言曰

曰夫古之賢者凡是建立豈與夫蒙其利者必固徼其所以見思者耶蓋仁惠浹人其久愈深雖欲已之自不能矣竊謂君之懿迹與古何愧當附之金石以信於萬年君又笑曰過矣愚何當此願毋言謹以謝諸君汝奇等退以圖以書諸余來文其言具如此余受之曰是可紀也迺為論次其所以云隄凡大小五其長共百三十七丈高一丈廣倍其高用人三萬計日四十五堤既成無有一人議之曰不可者噫如君者賢令矣

梓州永泰縣重建北橋記

文同

上即位之明年永泰縣重建北橋既成其令郭君經與其佐史君潤辭有請於邑人文同曰經潤辭不佞竊廩食於此伏自念終無施短才立異效鄉者議與斯民興是役以利其往來此前人憚勞畏譏久而不克為之者工今休矣問諸左右約諸所以調用民實不艱其供而咸謂其且當然者經潤辭輒不愧宜其文紀其工敢以累執事庶因之以傳乎無窮經潤辭幸矣同曰唯唯二

君之治端幹明以潔使人謹已聞之長老舊無有也均
徭賦平訴訟他人蓋亦有能之者夫何足書是舉也同
嘗觀二君之為乃有志於行愛惠之深者勞躬率心旦
夕惕勵暴外風露曾不以懈勤王事恤民隱古之賢吏
凡不過此是可書爾二君雖不見屬同亦將件次休績
揭諸華表之末以視於後人況二君所以來之意誠且
愿耶謹不避遜為之詞云維縣為梓之所領西上府治
蓋百有三十里叢岡沓嶺圖聚邑屋疆畛感陘號最險

下然賓旅還過此焉要隙大氏閭中清化始寧符陽諸
郡所仰二川產殖繒綿紵紵苧刺繡雕刻鏤治之物
與所市易牛羸絲繭椒蜜之貨日夜旁午絡繹駝負羸
羯抗蹄裂肩如水上故北出之道路踵相織近郭有
澗自東迤西橫匯曲決峭絕傾斷自昔經制有橋甚偉
以利其涉逾五十祀至和甲午夏潦洚溢遠谿逆讓噎溜
不寫鑄礮岸級礎崩納角楹翹虛羣版散墮日欹日
陷以至大壓庸吏數易一不省問人擠溝馬還寧間則

有矣維汾陽君為令之二年慈惠宣浹民實信賴諸散
已掾回力圖此因倡於衆曰是橋廢圯爾所痾悼予其
爾復謂予何者萬口一和令謀我協不煩令指願進諸
辦材糧交委日謁就事於是集斤鋸會錐錚治木伐石
均功授巧維武昌君適調此尉喜相厥役與令鳬藻昏
旭臨視犒饗豐美作息時節咸樂其用無少倦泐始癸
卯仲冬之丁未訖甲辰孟春之壬子輜棧朽堊一已絕
手觀其橫虛亘遠天矯虹截鉅載鉤擢攢扶鎖綰覺直

如削堅鞏如鑄厓廉縹緲阿榮跂踈湍瀨塘激無以泐
其固風日掀暴無以液其壯百數十年之利過莫知爾
既而行者止居者起田野畛隸閭閻賈儈提引穉幼扶
翼耆耄聯行散走環擁登降睨高窺深歎息欣喜如是
累日始肯罷靜爰有杖老倚柱而歌曰昔政之鄙浸以
毀兮今治之賢倏以全兮興事以時罔齎咨兮取用有
度胡怨怒兮無貸之仁濟斯民兮不朽之利安此地兮
同既為二君委以論譔以詳言之矣復取杖者之歌系

於後刻石道下以永行人之思治平元年二月二日記

通惠橋記

索輝

益之南簡之西陵之北吾鄉在焉衝三洲之會民閭僅
千室而商賈輪蹄往來憧憧不減大郡俯市門有長江
漱其址江出源餘霜山經龍淵歷漢陽而南趨岸感勢
迅水驟至即湍悍不可禦昔之虹梁鶴表可恃以固者
輒飄蕩無幾吏苦興廢雖古遺愛至是亦多倦色民病
涉久鄉僧士賢奮然以緣化從事即舊址架石磴而廣

之巨石黿背過者如步堂上又積石兩溪翼為長堤延
亘凡數十尋經費不資未嘗以聞有司借民力而功成
水患遂弭經始於崇寧三年十月甲子落成於大觀元
年二月丁酉士賢請鄙文以誌余戲謂賢曰凡物載形
象閱時數寧保勿壞況石有時以泐濟凡庸悟昏憤出
之沉淪俾造聖域其功利孰與是多賢曰若然豈可無
相亦安用子言為土圯木朽繩絕船危石且然爾吾且
妄作之子其為我妄言之余嘉僧之誠能游戲成如是

功德竊願締繪章句華艷其事為來者勸適預能書隨
計偕方伯戒行甚邇聊書歲月云大觀元年記

萬里橋記

劉光祖

維蜀慕王化通中國最為古遠載籍之傳尚矣至周武
王牧野之誓史官書之曰庸蜀羌髳微盧彭濮人則其
附聲教識仁暴槩見於經矣獨秦見伐資以取楚儀錯
之爭是也而儀城具存至今自秦置守李冰通二渠為
蜀萬世利今萬里橋之水蓋秦渠也是則蜀號陸海蕭

何藉之以基漢興五六十載文翁守蜀始取蜀秀民
立學官教之學比齊魯而司馬相如之文遂擅天下晚
有揚雄氏續孟荀之絃於漢之既衰漢祀中絕公孫述
竊據蜀蜀人以死抗述者班班風節又凜乎東京之首
也其後諸葛孔明用蜀以公信仁義懷而服之法度修
明禮樂幾於可復夫歷周秦兩漢千有餘年至孔明而以
蜀通吳抗魏三分天下存漢社稷雖號霸業實宣王風
蓋孔明學探伊傳而迹并管樂蜀人到今矜而誦之不

忘今羅城南門外笮橋之東七星橋之一曰長星橋者
古今相傳孔明於此送吳使張溫曰此水下至揚州萬
里後因以名或則曰費禕聘吳孔明送之至此曰萬里
之道從此始也孔明沒又千載橋之遺跡亦粗具非有
所甚壯麗偉觀也以千載之間人事更幾興廢而橋獨
以孔明故傳之亡窮其說雖殊名橋之義則一厥今天
下兼有吳蜀朝廷命帥其遠萬里蓋受孔明之任以來
由蜀走闕道亦如之其於此橋孰不懷古以圖今追孔

明之道德勲庸而思髣髴其行事侍御趙公之鎮蜀也
始至謁古相祠即命葺之明年作祠廟於其故營又明
年新其故宅廟貌每曰諸葛公三代遺才也用法而人
不怨任政而主不疑非天下之至公其孰能與於此今
其遺迹所存尚多而萬里橋者乃通吳之故事前帥沈
公常修廣之猶陋弗稱且易壞久將莫支則命增為石
魚鰲水為五道梁板悉易以木而屋之橋成眈眈屋成
繩繩嚴嚴翼翼都人大和會觀所未有民不知役而公

亦樂之風煙渺然岸木秀而川景麗公與客登此蓋未
嘗不徘徊而四顧也雖然茲橋也過而弗能玩玩而弗
能思者衆矣如公所懷風景抑末耳神交千古又安知
諸葛公通吳之志亦未嘗一日不在於中原也乎光祖
忝公元僚公命光祖為之記記其大者而遺其細蓋將
以大者望公俾公之功名垂千萬世若曰橋美名公又
與之為美觀非知公者知公莫如光祖

駟馬橋記

京鏜

出成都城北門不百步有橋舊名清遠凡自他道來成都者必經焉清獻趙公所編成都集記最為精詳余因究清遠得名之自則成都有橋七謂象應七星獨清遠不與及究司馬長卿題柱之所名昇仙者迺在數然其說謂當在上流五里今之名昇仙者在下流七里集記已疑其非古矣余謂長卿負飄飄凌雲游天地之意氣發輒趨長安時欲與蜀山川泄其不平其操筆大書當於萬目睽睽之地決不在三家市無疑也况象應七星之

義必其屈曲連屬不應昇仙獨與他橋相遼絕陵谷有
變移冊牘有缺逸竊意近時之清遠即昔日之昇仙不
然九達之衝百堞之旁一杠梁如此反不載於成都集
記何耶集記作於國朝使清遠之名果得於古清獻公
豈肯略之於簡編之外余久欲訂正之而無其因先是
橋隸邑尉邑尉多苟且逭責疊石編木工不精良不惟
簡陋視會府弗稱歲久石泐木且折勢將圯敗過者病
焉適於農隙水涸時撤而新之取長卿題柱之語扁以

駟馬因去清遠不經之名記其辯也不廢昇仙相仍之地存其疑也或曰是則然矣無亦以貴富期待蜀士耶曰余何敢淺待蜀士余所期待又在貴富外名當傳信稽事考迹曰駟馬為宜粵自六丁開蜀參井岷峨之英靈恥秦不文德不忍度劍關者百七十有餘年至漢文翁守蜀始振發之長卿實鍾其英靈者首入帝京以雄麗溫雅之文動萬乘震一時其後蜀士接軫以進者皆長卿破其荒議功當為文翁亞文翁創興之學長卿經行之

橋事雖不侔迹皆不當蕪沒余來成都學宮歌傾欲壓
已改築棟宇人謂自成均而下無此壯觀似足以侈文
翁化俗之萬分茲建橋以駟馬名自是長卿之遺蹤亦
不泯矣若曰長卿非全德不為蜀士所多則非余訪古
名橋之意也橋石其址以醴水如堆阜者二屋其背以
障風雨如樓觀者十有五楹板其虛距江底高二十有
二尺其修十有七丈其廣二丈甃南北兩涘以禦衝決
翼東西兩亭以便登覽經始於故歲十二月之戊戌告

具於今歲四月之庚辰是役也取餘於公帑則民不知擾責成於寮案則官無妄費易名以辯千古之疑則所傳或不朽持是以紀於石尚庶幾無愧辭云

王公隄記

韓已百

梓襟帶二江歲病泛溢大抵武弱而患小涪悍而患大此王公隄之所以築也涪脅東山迤不得肆蛇行西折薦蝕城址月積歲漲故其患視武相絕先是府牧繼植長堤橫遏江要毋使西顧己未仲秋一夕暴溢高出隄

背十有八尺平睨城闐州民惴恐江落隄潰中流之捷
蓋僅有存者閭丘公泳議新厥圖營度甫畢以命入覲
謀用中格迨提刑王公通攝府事躬相其宜乃度水所
嚮退依江堧伐石為隄三分其役臺任其一凡役之隸
於臺者幕屬董之府任其一凡役之隸於府者職寮董
之郵任其一凡役之隸於邑者令佐董之部分既定以
次受地人競於功不戒而勸隄成北自劉公隄之缺南
至考功隄之址其長上下總二千六百尺有奇自是歲

十月辛丑至明年三月癸亥其程得百四十日有奇役以工計凡三萬八千四百錢以緡計十分工役之數而一之糧以石計五分緡錢之數而二之隄崇十有六尺級而兩之以防圯跌沿壕起土為堤崇八尺廣稱之以備泛溢江獲安行無所迫阨寂如循牆緩驅徐去隄亦屹嶭延袤霞截虹卧堅不可犯父老縱觀懽呼舞手知環城萬室自今足倚此以為命矣於公虛心體道於世無累植德不計於物利物不計於功仁風惠澤洋溢蜀

左且無幾微見於顏面是區區者磨東山之石以侈不朽於公何有惟夫規畫之詳金粟之耗工役之度使寂寥無述來者莫考是無以永邦人之賜於無窮也用敢特書以詔世世俾勿壞公名勲字有功崇慶人蓋今日西南宿德云慶元庚申六月初八日門生文學掾韓已百記門生府簽判許奕書

灌縣治水記

明盧翊

蜀守李公冰鑿離堆以利蜀刻深淘灘淺作堰六言於

石立萬世治水者法所以制水出入為旱澇計者至矣
其用功緩急疎密之序意自較然漢晉以來率用是法
永嘉間李公羸深鑿之唐宋相承世享其利元始肆力
於堰無復深淘之意無乃公言不足法歟假令沙石湧
積水不得東潤則雖鎔金連障高數百尺牢不可拔亦
何取於堰哉矧所謂鐵龜鐵柱糜費幾千萬緡者曾未
幾何輒震蕩湮沒茫無可賴方諸籠石廉省今古便焉
者孰得比來民受其困宜坐諸此予竊少之乃檄府司

置鑿鑿鉅壘役夫三千從事灘磧以導其流堰則仍民
之便而已顧工多日少羣力告瘁未能勉其所欲為究
其所當止如公法言者恥也舊刻相傳在虎頭山鬪雞
臺水側其旁歲久剝落索弗獲慮後之君子無考焉因
磨石重鐫碑側云

景州曹侯開道濬川序

陳南賓

梁居荆揚上游其山連峰接岫道狹僅容足其難如登
天行者或四步五步六步七步乃止憩焉氣促汗流竟

日不一二程山谷之水會而為川奔悍奮擊篙師一失
舟楫不可復救羌夷憚於輸貢商旅怯於往來而拊膺
之歎鏹嶂之意所以不能已於李杜之詩之感也然自
有天地即有此山川不知其幾千萬年禹治洪水別九
州第梁於八岷嶠之既藝沱潛之既道蔡蒙之旅平和
夷之底績功無以加自時厥後若五丁之開峽李冰之
鑿山亦足尚矣景川曹侯承天子命來蜀以開道濟川
為已任凡東跨永寧西抵松茂南接雲貴北連棧道分

方命官指畫規畧曰某水也若是而導之某道也若是而闢之某石也若是而鑿之其思慮皆出人表官屬奉命惟謹經始於洪武辛未訖工於壬申中以農事輟者凡三月四塞之險官屬各有攸司而永寧建昌則又險之險者侯親視之運巧思鑿巨石通河道為灘者一百九十有三運土木塞險阻以取直徑為橋者五十有四故至雲南大理西番箐原其驛鋪皆堅固縝密不為一時苟且計其用心亦勤矣既而西北皆以成功告悉如

侯指於是輸貢者無難色往來者無愁歎聲使李杜生於今日豈無詩歌以美之哉噫人情可與樂成而不可與慮始當侯之經營也衆莫不曰蜀之險阻天造地設自開闢以來未之或治今茲之舉無異於愚公之移山也徒斃民耳惟侯不惑於衆人之議而決諸一心躬任其責雖暑雨祁寒不避以八月之勤勞而成千百年之利蓋智者之所為衆人固不識則聖皇之所特命而責成者夫豈偶然之故哉宜勒諸堅岷以示來者侯名震

鳳陽人

渠縣重修琅瑯四橋記

吳伯通

渠古邑也地介夔梓之間而隸於果凡沂沿巴峽往來
於蜀者或捨棹於萬而西上或振策自益而東下必道
渠渠亦蜀之要衝也其東崇山亘千里自北而南渠江
循山西四十里與並馳山中之水破山旁出西走而奔
注焉官道出江山間故多涉溪澗入渠境凡涉溪四琅
瑯其大者每山雨則湍流澎湃怒號而激撞橋輒壞阻

溺震駭沾濕行道病焉成化丙午春洪都秦侯自諫垣
出貳守廣安道出於茲目橋之圯閔行之難其心惻焉
思濟其難下車未幾適承檄往攝渠治視篆之日選於
衆舉義官邵君本乾及吳某以作橋事委之侯膚敏聞
爽樂易近民敷政聽訟既明且恕務不拂乎人情浹旬
彌月渠人翕然順之而邵等忠勤幹固克濟其謀悅以
先民而鼓舞之相與捐資鳩工伐石於山治以為梁琅
琊功大費博其上下三小溪省三之二肇功於夏五月

及農隙也不踰時而四橋成侯率邑文學偕往落之喜邵等之急於趨事以能有成功也賦詩獎之首尾云隱隱虹橋卧急湍平平官道雨初乾行人欲問經營事白髮烏紗兩義官蓋不有其功而歸諸下可謂有功而不德能謙君子也邵不敢居捧詩謁予山中為道顛末且曰是役也勞心者我侯勞力者我民吾輩受命率衆終其事勞何有焉願為記之以彰我侯之德我民之良能無忘今日也夫子嘗曰君子學道則愛人小人學道則

易使也吾聞其語矣今見其人也安可無言易曰天施地生其益無方蓋天地之交陰陽之應一施一受氣通德合故萬物以成君臣天地也上下陰陽也君施臣承上令下從相交相應志符道洽故萬事以成凡父子夫婦之相與以成厥家皆是理也明乎此而行之謂之學道是故以上則愛以下則順侯之愛一生於心遂發於事克承君施而且能令學道之功不可誣也田野之民初未嘗學一令之以道其順上命以共成其事乃知此

道在人心信其固有而非遠也獨恨無以咨之者則凡
違令豈皆民之罪哉方今聖君大德猶天施至溥也嘅
夫臣工有學焉有弗學焉或學焉而不知道鮮克順承
而致之民以隳其心使知順上之道故政事日隳而上
貽國家之憂豈有他哉利欲汨其心耳夫人臣惟利為
懷則獵取漁奪何所不至至於怨懣並興猶昧自反而
槩曰民頑忿疾橫加焉於是民無樂生之心灾害作矣
嗚呼俗焉弊也久矣可勝言哉蓋吾見亦夥矣若侯是

舉殊異常事真可以愧衰俗而振勵之也據春秋重用民力法當得書而事可訓又不可不書故書侯南昌人名某字叔熙乙未進士刑科給事中言事謫官出貳吾郡云

中江縣余嶺新道記

張翀

中江當兩川雲貴秦隴行旅之衝實劍外劇縣縣西二十里有山曰高崖壁立雲矗俯瞰羣峰勢與青城大峨伍山之麓故有舖曰雙魚踰雙魚五里溪水自北下

夏秋交輔以行潦其悍滋甚有司者常橋之號曰高橋
橋西上數里為鋪曰飛黃之上十里曰方基又十里曰
走馬自雙魚而上逆坂重峴時相勾連巨細石鉅顛顛
齒齒行者必擇地然後可投步至走馬稍已又所在乏
水泉當溽暑時公私往來無以濟渴不死則病循縣西
五里出雙魚之北歷兩河口蠻洞直距方基走馬之間
一徑弦直可通轍跡而少迂回演迤艱難攀跨之狀夾
徑有井或寒泉錯出石罅沕滴漫羨其聲淙淙疑所謂

井渫不食者官道不出於此而出於彼何也新建余侯
祺來令之五年不為苛轍之政縣以無事乃屬其土人
而告之吾聞道弗不治司空不視涂澤不陂川不梁周
單子所以知陳之亡也今官道之利害前人之智非不
能及此而不肯一舉手或有意舉手而奪於羣咻憚而
不為智及之而不為不仁憚於人言而不為不勇吾無
以令為也茲將舍其迂而就其直棄其險而從其易僉
其謂何皆應之曰然遂以嘉靖四年十有一月庚申刊

木吏穢鑿兩河蠻洞之道而通之下上連延僅二十里
廣加故道三之一并徙雙魚飛黃方基三亭於形勢之
便區取南之直以易北不傷於民撤舊亭之材以為新
不費於財首尾兩閱月厥工告成而縣之人忘其勞涂
之人始得便周行之安也兩河當高橋上游十里其患
差小乃廢高橋舊趾改剏石橋二於其上為橋之空各
三橋之陽為亭一不侈不陋亢爽可喜榜之曰仰止以
休行役之士大夫凡所規畫悉適人意旄倪歡呼如出

一口按察使呂君道夫適以入覲過而嘉之更舊鋪之名雙魚者曰余嶺飛黃曰平易方基曰便民用慰山靈而視後來君子於是知余侯之善為政也予方戍瞿門縣博士李載陽不惜二千里走書曰願有記按周禮合方野廬二氏皆以道路為職凡舟車輦豆叙而行之不使窒閼而月令以季春之月周視原野開通道路為訓三代之有司治其職以待四方之賓旅者詳矣蓋秉禮立制而授之官師細大具舉而纖悉無恨此所以為先

王之法非後世所及也去古益遠士之工於取名者羸
詘之不知而蔽所恃以侈耳目之觀其齷齪者視民之
利害恬然不以動其心媮得避嫌以苟朝夕要之二者
其操心之私均也然則為今之吏能舉事以貽百世之
利非役志以干譽而求益也而民不以為病蓋仁者之勇
矣於先王之法又深得其遺意雖欲不記其可乎侯字
原貞宋尚書襄公靖之後丁卯鄉進士其興學慎獄懾
奸惠民之政皆有明法往歲寧賊之亂潔身以去志操

凜凜薦紳間多能誦之者載陽雲南趙州人及典史徐朝進皆嘗贅是役法得附書

平墓願灘記

安磐

蜀之灘以千計戎州之西最險戎以西灘以百計犍為之墓願最險灘在犍為四十里石

闕

中橫江水走其上

前壅後迫勢不得不起而立衝撞噴薄叫號怒激聲聞十數里外舟人上下咸重足變色睜目屏氣以幸無事一失其勢輒破壞漂溺不可救人死是灘者歲以千數

也昔李冰守蜀鑿豚堰以避沫水之害豚崖在嘉州犍
為犍為嘉屬邑也相去不遠不應舍之不治然冰之治
水也多沈犀以彈壓湍急犍為故有沈犀驛豈冰嘗治
之而無成歟抑江流變遷當時水由他道而無是險歟
不可知也正德丙子蘄陽張公思齊以憲僉行縣邑人
赴訴萬口一辭時適有幾公可與事公進諸生而語之
吾受天子命官以水利為名豈一一利之去害乃所以
為利也計度安出諸生曰濬其西岸水析而西灘

其可夷公曰然吾意如是驗其同耳具事委曲得俞監
臨監臨者巡按監察御史盧公雍也乃卜乃虔臨江用
牲萬夫齊奮身自為督壅石為堤以木為捍既鑿既疏
自下而上時天大寒雪雨交集公撤去麾蓋勞來巡行
率至夜乃息凡在役者益感公意併力趨事兩月告成
導江之日人士走觀空其一邑歡呼嗟嘆不圖成功乃
至於此由是灘險遂虛而夜亦可航矣州倅任君倫邑
令王君大衢於斯役與有勞者率諸生余恭周德詣磐

曰代來之險平之一日積歲累年無一舟覆公功大矣
記其可無罄辱公同年與聞始議用紀成事曷其敢辭
聞之活千人者其後必大公之所活何止千人大不大
於公無與而吾人之頌功受賜家戶尸祝當與此江終
矣公去蜀之十年始得次而書之屬邑簿王君某刻石
以垂無極

城東新泉記

黃景夔

城東新泉故泉也故泉曷曰新日以其故之辱也始浚

之若新焉曷曰故之辱出城東百餘步大涂之旁維泉之源脈長而甘城中井鹵人莫汲汲城之外東門之人資斯泉顧獨出石間僅勺挹不受巨器浸漬溪流汎淖沮洳牛馬之過飲之且洩焉汲者守泉不得則於溪匪注盈汰澄不可汲踵踵競次旱則復於泉涸冬尤艱剖冰取饗人息爨俟水之至不及則于北泉又遠難致論者咸病東泉云予郊行過泉而喟曰泉哉泉哉曷居於此爾資之深而功不溥質甚美而蒙不潔斯非爾泉辱

哉乃心惻而新斯泉曷曰新役夫雲集下具如雨巉穿
嵯巖深入齒齒泓然成池汲者如攜不次不勞不獨利
東門城之中咸汲焉崇之方臺庇之莪亭曲闌四周歟
如閑如幽蔭寒冽炙燠之所不及牛馬之迹無緣而來
觀者顧嗟不識其故故曰新既成飲亭下顧泉而賀曰
嘻泉哉自有天地即有爾泉豈無主翁咸莫爾顧茲維
新在我慶爾泉之遭繆予理守罔敢苟安濬清濯污託
風在泉竊志焉抑謂我留情事外不急簿領迹亦似之

知我乎將由爾泉乎罪我乎將由爾泉乎爾乃扁亭曰
城東新泉而刻語於石樹亭中

